

Ibarretxek «harrokeria» egotzi dio Aznarri, baina harekin bilduko da, hilaren 22an

Arazoak hebadideetan «era sutsuan» eztabaidatuz ez direla konpontzen esan du

Eduarne Begiristain / Gasteiz

Jose Maria Aznar Espainiako presidentea eginiko adierazpenei erantzun zien atzo Juan Jose Ibarretxe lehendakariak. Aznarrek «harrotasun» gutxiago izan behar duela adierazi zuen, «apaltasunez gauzak askoz hobeto konpontzen direlako». Halaber kritikatu zuen Aznarrek hedabideen bitartez hitz egitea eta, ildo horretan, Espainiako presidentearekin mintzatu delako azpimarratu zuen.

JUAN JOSE IBARRETXE EAEko lehendakariak Aznar presidentea EAJ eta Eusko Jaurlaritzaren aurka egindako adierazpenei erantzun zien atzo. Ibarretxek azaldu zuenez, Aznarrek «harrotasun» gutxiago izan beharko luke, «apaltasunez arazoak hobeto konpontzen direlako». Halaber, «bake eta normalizazio politikoa posible bihurtuko duen prozesuari oinarri sendoak emateko konpromisoa» adierazi zion Espainiako presidenteari. Era berean, helburu hori lortzeko ahale-



JOSEBA OLALDE

Juan Jose Ibarretxe lehendakaria, atzo Ajuria Enean adierazpen instituzionala irakurri zuenean.

gin guztiak egingo dituela azpimarratu zuen.

Horretaz gain, Ibarretxeren irudiko, «oldarkotasun eta konfrontazioz» betetako adierazpenek «jarrerak hurbildu baino gehiago urruntzen dituzte». Gobernu bateko presidentea horrelako

adierazpenak egitea ez zaiola «egokia» iruditzen gaineratu zuen.

Hilaren 22an bilduko da Aznarrekin

Ibarretxe Aznarrekin hitz egingo duen prest azaldu zen, eta,

hain zuzen ere, iragarrita dagoen bilera hori hilaren 22an egingo dela jakinarazi zuen atzo Moncloak. Hala, bilera aurretik Aznar hedabideen bitartez mintzatzea kritikatu zuen EAEko lehendakariak: «Herri honetan inork uste al du gauzak konpontze-

JUAN JOSE IBARRETXE

Aznarren adierazpenak

■ ■ «Oldarkotasun eta gatazkarako hitzek jarrerak hurbildu baino gehiago urrundu egiten dituzte»

Baketzea

■ ■ ■ «Bakea erdietsiko dugu, edozeinen gogoaren kontra bada ere»

ko erarik onena komunikabideen bidez era sutsuan eztabaidatzea dela?». Eta, ondoren, erantzun zuen berak Aznarri esan beharrekoa «zuzenean» esango diola. Horren haritik, nabarmendu zuen bakea lortzeko bidean suertatzen diren arazoei elkarrizketaren bidez eman behar zaiela irtenbidea. Lan hori «guztion ideiak eta esku-bide zein askatasunak errespetatuz» egin behar dela azaldu zuen. Azken batean «errespetua eta tolerantzia» behar direla esan zuen Ibarretxek.

Bukatzeko, euskal gizarteari adierazi zion bakea lortu arte gobernuak ez dela geldituko eta hori bera dela Eusko Jaurlaritza osatzen duten alderdien xedea.

agiria

Ibarretxeren adierazpena

• Jose Maria Aznarrek bezperan eginiko adierazpen gogorrei adierazpen instituzional baten bidez erantzun zion atzo Ibarretxek.

■ Aznarrek atzo egin adierazpenei buruz nire iritzia emango dut jarraian:

1. Lehendakariak eta Eusko Jaurlaritzak berriz ere elkartasuna azaldu nahi du gizakion min eta sufimenduaren aurrean, eta bereziki indarkeriaren biktimak guztiei. Elkar-tasun sentimendu hori jakinarazi nion Aznarri astelehenean, Jesus Maria Pedrosaren familia politikoa-ekin batera ETaren indarkeria gaitzesteko manifestazioan parte hartu nuenean.

Lehendakari eta pertsona gisa, beti defendatu dut bizitzarekiko errespetua, gizaki guztion oinarrizko eskubidea delako. Herri hau etengabeko erreferentzia izan da Eusko Jaurlaritza osatzen duten alderdi demokratikoentzat eta bereziki 105

urte dituen nire alderdiarentzat ere. Denok iragan bat dugu, bakoitzak memoria egin dezala berea berrezartzeko. Baina demokraziaren defentsari eta edonolako diktaduraren aurkako borrokari dagokienez, bermatzen gaituen historia bat dugu eta ez dugu irakaskuntzarik onartuko inoren aldetik.

2. Hau benetan konpondu nahi al dugu? Horrela bada, ez dut uste hau une egokia denik zatiketa eta erasoak areagotzen dituzten polemika antzuetan erortzeko.

Momenturik zailenetan ordezkari politikook lasaitasuna, oreka eta ikuspegi zabala azaldu behar ditugu arazoei konponbidea eman ahal izateko, ez areagotzeko. Ondo dakit euskaldun guztien lehendakari gisa dudana erantzukizuna handia dela eta ondo dakit ere euskal gizarteak eskatzen diguna hau konpontzea dela.

3. Nik ez dut nire herriko giro sozial eta politikoa gehiago krispatu nahi. Hau ez da lehendakariari dagokion eginkizuna, nire lana irtenbidea bilatzea da. Zentzu horretan,

oldarkotasun eta konfrontazioz betetako adierazpenak egiteak jarrerak hurbildu beharrean urruntzen dituzte, eta ez zaizkit egokienak iruditzen gatazka bati irtenbideak eman nahi dizkion gobernu bateko presidentearen ahotan.

Herri honetan norbaitek uste al du gauzak konpontzeko modurik onena hedabideetan era sutsuan eztabaidatzea dela? Nik ez. Aznar jaunari esan behar diodana pertsonalki esango diot, ez komunikabideen bidez. Bakea lortzeko sortzen zaizkigun arazoei eman behar zaion konponbidea argi dago, elkarrizketaren bidean sartzea, guztion ideiak eta guztion eskubide eta askatasunak errespetatuz, guztion arteko bizikidetzeta eta euskal herritarren borondate demokratikoa bermatzen dituzten arauak errespetatuz.

Azken batean, errespetua eta tolerantzia behar ditugu.

Bukatzeko, itxaropen, adostasun eta elkarrizketaren aldeko mezu bat zabaldu nahi dut. Lehendakariak entzun nahi duten guztiak hitz egiten jarraituko du, batzuekin eta bes-

teekin. Bakea lortzeko ahalegin guztiak egingo ditut. Hori argi utzi nahi dut batez ere berriz iraganean kokatu nahi gaituztenentzat.

Nik etorkizunaren aldeko apustu argia egin dut, eta euskal gizarteari argi eta garbi azaldu nahi diot ez garela geldituko bakea lortu arte. Hauxe da gure helburua, hauxe da EAJ eta EA Eusko Jaurlaritza osatzen duten alderdien helburua. Zentzu horretan, helburu sendo eta estrategikoa da eta ez ezerk ez inork ez gaituzte alenduko euskal gizartearen bakea eta normalizazio politikoa behin betirako lortzeko hasi dugun bidetik. Eta lortuko dugu, norbaiten gogoaren kontra bada ere.

Zentzu horretan, Aznar jaunari azaldu nahi diot konpromiso eta borondate osoa ditudala Euskadin bakea eta normalizazio politikoa posible bihurtuko duen prozesuari oinarri sendoak emateko. Ahalegin guztiak egingo ditut helburu hori lortzeko. Denok harrotasun gutxiago azaldu beharko genuke, apaltasunez arazoak askoz hobeto konpontzen dira eta.